
«ԱՐՄԵՆԻԱ» ՇԱԲԱԹԱԹԵՐԹԸ
(հրատարակության 125-ամյակի առթիվ)

ԱԼՈՅԱՆ Լ. Ա.

Օսմանյան կայսրությունը XIX դ. երկրորդ կեսին քայքայված ու սոցիալ-քաղաքական ճգնաժամի պատճառով բզկտված մի երկիր էր՝ տարածքով մեծ, ռազմաֆեոդալական տերություն: Այս հետամնաց երկրի 28 միլիոն բնակչությունից 24 միլիոնը զբաղված էր գյուղատնտեսությամբ: Թուրք ազգը պատրաստ չէր կուլտուրական առաջընթացի, և այն ժողովուրդները, որոնք պատմության հանգամանքների բերումով հայտնվել էին թուրքերի գերիշխանության տակ, դատապարտված էին ապրելու մտավոր, բարոյական ու սոցիալ-տնտեսական դժվարին պայմաններում: Հարկերի հավաքման անօրեն ու կամայական եղանակներ, պաշտոնական օղակներում կատարվող գողություններ, կաշառակերություն, անօրինականություններ, արդարության լիակատար բացակայություն, անկարգություններ կառավարության բոլոր օղակներում՝ ահա թուրքերի իրական նկարագիրը:

Դրությունը լուրջ էր նաև Ռուսահայաստանում: Ալեքսանդր Երկրորդի սպանությունից հետո գահ բարձրացած Ալեքսանդր Երրորդը սկսում է խավար ու հետադիմական կառավարման իր շրջանը, որը հոգեհարազատ էր համիդյան ռեժիմին: Ցարն այլևս հետամուտ չէր Թուրքիայի կործանմանը, այլ ընդհակառակը, ձգտում էր բարեկամանալ թուրքերի հետ, իր պաշտպանության տակ առնել նրանց շահերը: Ցարական իշխանությունները 1880-ականի սկզբից թշնամական դիրք բռնեցին հայության ազգային ինքնորոշման ձգտումների նկատմամբ: Հայկական հարցը մի տևական ժամանակ դուրս մնաց ռուսական քաղաքական օրակարգից: Մինչդեռ, առանց Ռուսաստանի համաձայնության, Հայկական հարցը դրական լուծում ստանալ չէր կարող: Անհուսալի այս դրությունն էլ հայ մտավորականներին ստիպեց գնալու ազգային-ազատագրական պայքարի ուղիով: Հեղափոխական խմբեր ստեղծվեցին ինչպես Արևմտյան Հայաստանում, այնպես էլ բազմաթիվ հայաշատ կենտրոններում:

Անդրկովկասում հեղափոխական խմբակների երևալը, որոնց նըպատակն էր ազատագրել Թուրքիայի հպատակության տակ ապրող իրենց եղբայրներին, ցարական իշխանությունների կողմից սվիններով ընդունվեց: Նրանք վախենում էին ապագա միասնական Հայաստանի ստեղծման գաղափարից: Ցարական ռեակցիայի պայմաններում սոցիալական ու ազգային հակասություններն Անդրկովկասում և Հայաստանում ծայր աստիճան սրված էին: Ուժեղանում էր գրաքննությունը, փակվում էին հայկական դպրոցներն ու մամուլի առաջադեմ օրգանները: Հետապնդվում ու բանտ էին նետվում ազգային-ազատագրական պայքարի կոչողները: «Ազգային ինքնագիտակցության արթնացումը և ազգային կյանքի աշխուժացումը չէին կարող չանհանգստացնել ռուսական ինքնակալությանը, որ ձգտում

էր տեղական ժողովրդին պահել մշտապես հնազանդ ու հետամնաց վիճակում: Հատկապես 19-րդ դարի 80-ականներին ցարիզմն անցավ բացահայտ ռուսիֆիկացիայի քաղաքականության: Հալածանքներ սկսվեցին հատկապես հայ ժողովրդի դեմ, որովհետև այդ շրջանում Արևմտահայաստանում ծայր առած հայկական ազգային-ազատագրական շարժումները հանդիպում էին կոմկասահայության ջերմ պաշտպանությանն ու օժանդակությանը»¹:

Միևնույն դրությունն էր նաև Արևմտյան Հայաստանում, որտեղ հայկական շրջաններում ստեղծվում էին ընդհատակյա ընկերություններ, ինքնապաշտպանական կոմիտեներ: Ճնշված հայ ժողովուրդը վարչակարգի դեմ ըմբոստանում էր ոչ միայն զենքով, այլ նաև գաղափարական պայքարի միջոցով:

1880-ականին պարզ դարձավ, որ հայ ազգի միավորման ու միասնականության հարցը չի լուծվելու: Ավելին, սուլթանն ինքն էր միայնակ «լուծում» այդ հարցը՝ հայ ազգի բնաջնջմամբ: Ահա ինչու ձևավորվեց հայկական ազգային, հեղափոխական գաղափարախոսությունը: Վան-Վասպուրականում, առաջինը Արևմտյան Հայաստանում ստեղծվեցին կամավորական ջոկատներ:

Եվ չնայած ռուսական ցարի հայատյաց քաղաքականությանը, արևմտահայ նշանավոր գործիչներ Մկրտիչ Խրիմյանը, Խորեն Հովհաննիսյանը և Հայրապետ Խանջյանը 1882 թ. փետրվարի 10-ի մի նամակում, որն ուղղված էր Ալեքսանդր Երրորդին, գրում էին. «Ներկայումս հայ ժողովուրդը գտնվում է կործանման եզրին, քանզի վիճակը ծանր է և հուսահատական: Փոխանակ այն բանի, որ Բեռլինի դաշնագրով, Հայոց հարցին նվիրված 61-րդ հոդվածը վերջ դնեք անտանելի հալածանքներին, նոր ճնշումները հաստատում են, որ եթե այսպես շարունակվի, ապա այդ հոդվածը կդառնա մեր կործանման պատճառը»²:

Եվ քանի որ սուլթանական ժանդարմերիան խիստ հսկողություն էր սահմանել ընդդիմադիրների նկատմամբ, վերջիններս ստիպված եղան Մկրտիչ Փորթուգալյանին գործուղել Մարսել, որտեղ էլ 1885 թ. լույս տեսավ «Արմենիա» շաբաթաթերթը: Այն ազատ էր բացահայտելու ճշմարտությունը Հայաստանի մասին, հասարակական կարծիք ստեղծելու Եվրոպայում և դրանով իսկ ճնշում գործադրելու միջազգային դիվանագիտության վրա՝ նրան հարկադրելով վերադարձել Հայկական հարցը: Սա արմենականների խմբակցության ստեղծման հիմնավորումը եղավ, որի անունով էլ կոչվեց արմենականների կուսակցությունը: Նրանք ազգային հեղափոխականության առաջին քարոզիչներն էին, որոնք քարոզում էին զինված պայքար մղել թուրք բռնատիրության դեմ: Բայց ազգային-ազատագրական ուղիների հարցում արմենականները միասնական չէին: Զինված ապստամբության կողմնակիցների կողքին կար նաև մի այլ թև, որը նախընտրում էր ազատական դիվանագիտական ուղին՝

¹ Ավետիսյան Վ. Ա., *Հայ հասարակական մտքի զարգացումը*, Ե., 1976, էջ 66-67:

² *Архив внешней политики Российской империи, главный архив, д. 119, л. 50.*

ակնկալելով եվրոպական տերությունների հովանավորությունը: Խումբը պառակտվեց. չափավոր թևն անցավ Լոնդոն, որտեղ հրատարակեց “L’ Armenie” թերթը՝ ֆրանսերեն և անգլերեն լեզուներով: Նրանց քարոզչությունն արձագանք գտավ հայրենիքում, որտեղ ստեղծվեցին խմբեր ու միություններ, որոնք գործուն մասնակցություն ունեցան ինքնապաշտպանական մի շարք կոնֆլիկտների ժամանակ: Մեծ էր Արմենականների դերը ազգային քաղաքական կուսակցությունների ձևավորման գործում:

«Արմենիան» տեղեկացնում էր հայ ժողովրդի դեմ թուրք փաշաների, քուրդ բեյերի և սուլթանական կառավարության հալածանքների մասին: Բռնակալներին մերկացնելուց բացի, շաբաթաթերթը միաժամանակ նշում էր հայ գյուղացու պայքարի և ազատության ուղին: Այդ ուղին Մկրտիչ Փորթուգալյանը համարում էր բուլղար ժողովրդի ազատագրական պայքարը, որի ղեկավարների հերոսական պատմության դրվագները բոլոր պատեհ առիթներով ներկայացնում էր հայ ընթերցողներին: Թերթը համոզված էր, որ հայ հեղափոխական բոլոր ուժերը պետք է նվիրվեն բացառապես թուրքահայ ժողովրդի դատի պաշտպանությանը, որովհետև հայության մեծամասնության 2/3-ը Արևմտյան Հայաստանում էր ապրում, որտեղ հայկական հողերի մեծագույն մասն էր:

«19-րդ դարի 80-ական թվականները հայոց բազմադարյան ու արյունաներկ պատմության քառուղիները մտան իբրև նախակուսակցական պայքարի տասնամյակ, որի հորձանուտներում, իբրև այդ շարժման օրգանական շարունակություն, բնականոն ձևով, հերթականությամբ ծնունդ առնելով, հրապարակ իջան ազգային-քաղաքական երեք կուսակցությունները: Սրանք, իրար լրացնելով, շատ դեպքերում իրար հակադրվելով, տարբեր դիրքերից, ամենատարբեր ձևերով ու մեթոդներով գլխավորեցին հայ ժողովրդի ազատագրական, հեղափոխական պայքարը՝ ուղղված օսմանյան բռնատիրության, երբեմն էլ ցարական ինքնակալության դեմ»³:

Դարավերջին պանիսլամիստների և պանթուրքիստների սկսած ջարդերի բացահայտ քաղաքականությունը հայկական ազգային-քաղաքական կուսակցություններին հարկադրեց մտաեռզվել սեփական ժողովրդին ֆիզիկական բնաջնջումից փրկելու, զենքին զենքով դիմագրավելու խնդիրներով: Եվ մինչև հնչակյան կուսակցության ստեղծումը կուսակցության առաջնորդ Ավետիս Նազարբեկյանը, որն «Արմենիային» թղթակցում էր Լեռենց կեղծանվամբ, գրում էր, որ Թուրքիայում հայերի ծանր դրությանը վերջ տալու համար «միակ միջոցը հեղափոխությունն է»⁴: Նա քննադատում էր հայրենասերների այն խմբին, որը ելքը տեսնում էր դիվանագիտության մեջ, այն գործիչներին, որոնք կարծում էին, թե պետք է սպասել մինչև մեծ տերությունները գործադրել կտան 61-րդ հոդվածը: Նազարբեկյանը դա համարում էր զառանցանք և հայտարարում, որ

³ Ղազարյան Հ., Հայ ժողովրդի ցեղասպանությունը Օսմանյան կայսրությունում, հ. 1, Ե., 2004, էջ 510:

⁴ Արմենիա, 1886, N 89:

հայր այդպիսով արև չի տեսնի: Նա համոզված էր, որ սպասելը կործանարար է, և «Միայն արյունն է, որ հայ ժողովրդին կփրկի այն ախտից, որով մինչև հիմա նա տանջվում է»⁵: Նրա ամբողջ հույսը աշխարհի տարբեր երկրներում երիտասարդական խմբերի ստեղծումն էր լինելու, որոնք ունենալով իրենց գանձարանները՝ պետք է զենք ձեռք բերեին և միասնաբար պայքարեին հայրենի- քի ազատագրության համար: Նա հայտարարում էր. «Երիտասարդներ, ժամանակը չի սպասում, իսկ Հայաստանում մեր եղբայրների չարչարանքները սովորանում են, նրանք ավելի ստրկանում են, նրանք խեղդվում են՝ օգնության հասեք նրանց, շտապեք կազմակերպվել»⁶:

Մակայն Փորթուգալյանն ու Նազարբեկյանը նաև տարաձայնություններ ունեին: «Արմենիայի» խմբագիրը չէր ընդունում հնչակյանների ընկերվարական գաղափարները՝ մշակականների նման հայտարարելով, թե նույնիսկ շատ առաջավոր ազգեր դեռևս վեճեր ունեն այդպիսի գաղափարների նկատմամբ, իսկ արևմտահայը նույնիսկ ինքն իրեն կառավարելու իրավունք չունի: Եվ բացի դրանից, հնչակյանները խոսում են գործարանատերերի և բանվորների վեճերի մասին, մինչդեռ Հայաստանում ոչ գործարան կա, ոչ էլ բանվոր:

Նազարբեկյանն էլ քննադատում էր Փորթուգալյանին ու նրա թերթը՝ հայտարարելով, թե հայերի պայքարը չպետք է սահմանափակվի միայն թուրքական բռնապետության դեմ մարտնչելով. «մեր պայքարը պարզապես ազգային անկախություն ունենալը չէ, այլ պայքարը բոլոր բռնությունների, նաև սեփական շահագործողների դեմ»⁷:

Հնչակյանների ահաբեկչական գործողությունների դեմ արտահայտվողներից էր նաև «Արմենիան»: Թերթը գրում էր, թե պետք է ձեռնպահ մնալ նոր արյունահեղություններից, լինել խոհեմ, զգոն և լուրջ, անիմաստ զոհաբերությունները կարող են միայն վնաս բերել հայրենիքին: Անհրաժեշտ է հաշվի առնել նաև քաղաքական իրադրությունը, մանավանդ որ հայ գյուղացիությունն անկազմակերպ է, անզեն, պայքարի համար անպատրաստ, իսկ քաղաքային բնակչությունն ընդհանրապես անտարբեր է այս հարցերում: Հետաքրքրական փաստ էր արձանագրում «Արմենիան»՝ սուլթանի թելադրությամբ Սիմոն Բեյը և Հ. Նուրյանը Բերայում հանդիպումներ էին ունենում Աշրգյան Խորեն պատրիարքի հետ և խորհրդակցում «Արմենիան», «Հայաստանը» և «Հնչակը» փակելու մասին⁸: Ավելին, Եվրոպա է գործուղվում վարդապետ Եղիշե Դուրյանը՝ համոզելու իր հայրենակիցներին՝ բոյկոտել ըմբոստ թերթերի խմբագիրներին: Աշրգյանը Դուրյանին ապսպրել էր չքաջալերել հեղափոխական շարժումները, որովհետև համոզված էր, որ այդ շարժումներն ավելի են սրելու թուրք տարրերի ամենավայրենի բռնությունները:

⁵ Նույն տեղում:

⁶ Նույն տեղում:

⁷ Հնչակ, 1889, N 2:

⁸ Արմենիա, 1888, N 22:

Այսօրինակ մի լուր տպագրեց «Արևելքը», որով դատապարտում էր արտասահմանի հայերեն այն հրատարակությունները, որոնք հակասությանական քարոզչությամբ էին զբաղվում⁹։ Անդրադառնալով այս հրատարակմանը՝ «Արմենիայի» Պոլսի թղթակից Հրուդենը գրում է, թե Ճիշտ է, որ Բ. դուռը, իսկապես, մտադիր է մի պաշտոնյա ուղարկել Եվրոպա, պատրիարքի համաձայնությամբ, որպեսզի բանակցի ազատամիտ ու հեղափոխական հայ թերթերի խմբագիրների հետ՝ դադարեցնել տալու այդ հրատարակությունները։

1880-ականի երկրորդ կեսին և հատկապես 1890-ական թվականներին, Համիդի բռնատիրության ծավալմանը զուգընթաց, ավելի խիստ վերահսկողության ենթարկվեցին արևմտահայության սահ-մանադրական մարմինները։ Սուլթանի հրահանգներով տարածվում էին երկրի կեղծ ու կարծեցյալ բարգավաճման, հպատակների բա-վարարվածության, անդորրության ու խաղաղության վերաբերյալ սարքովի հանրագրեր, որոնք առանձնապես շատացան 1888- 1889 թթ.¹⁰։ Փորթուզայանի «Արմենիան» շարունակաբար մերկացնում էր նման կեղծիքները։ Թերթը գրում էր. «Վանի թուրք իշխանությունների հրահանգով կազմվել է գոհունակության հանրագիր՝ նախապես խաբելով ժողովրդին»¹¹։ Իրողությունը բացահայտելուց հետո հուզված ժողովուրդը բողոքում է դրա դեմ՝ ներխուժելով Վանի առաջնորդարան։ Ահա ինչու Պոլսի ազգային ժողովը բռնակալության դեմ վերածվել էր պարապ խոսքերի, չնչին ու աննպատակ կրքերի ցուցադրման հավաքատեղիի, որը կապ չունեի ժողովրդին հուզող խնդիրների հետ։

Օսմանյան լծից ազատվելը բոլոր հայերի երազանքն էր, և գոյության համար պայքարի գաղափարն էլ արտահայտվում էր հայ քաղաքական կուսակցությունների ծրագրերում։ Եվ արմենականների նման հնչյակյաններն էլ կարծում էին, թե միայն նոր պատերազմը Թուրքիայի և Ռուսաստանի միջև պետք է լինի ամենահարմար հնարավորությունը՝ ոտքի կանգնեցնելու հայ ժողովրդին բռնակալների դեմ։ Սակայն հնչյակյանների ահաբեկչական գաղափարախոսությանը արմենականները, ինչպես և «Մշակը», հակադրում էին շրջահայաց մոտեցումը՝ այս կերպ հակառակվելով նաև դաշնակցության գործելակերպին։ Այս կապակցությամբ, երբ դաշնակցության և հնչյակյանների ներկայացուցիչները գաղտնի հանդիպումներ էին կազմակերպում երիտթուրքերի առաջնորդների հետ, դեռևս 1892 թ. «Մշակի» խմբագիր Արծրունին, որը մեծ համարում ուներ հայկական երեք կուսակցությունների առաջնորդների շրջանում և համարվում էր այդ կուսակցությունների կայացման կնքահայրը, գրում էր. «Այդ կուսակցությունը (երիտթուրքերի - Ա. Լ.) ձգտում է իբրև թե Եվրոպայի հետ սերտ կապեր կապելով՝ փոխառել արևմտաեվրոպական քաղաքական հաստատությունները և մտցնելով նրանց Թուրքիայի մեջ՝ կենդանացնել նրանցով իր հայրենիքի հնացած,

⁹ *Արևելք, 8.XII.1888*։

¹⁰ **Մողումոնյան Գ.,** *Նոր լրագրությունը Պոլսում 19-րդ դարի 80-ականներին, Ե., 2009, էջ 108*։

¹¹ *Արմենիա, 23.VIII.1887*։

սպառված քաղաքական կազմակերպությունը: Սակայն այդ կուսակցությունը ուրիշ բան չէ, եթե ոչ եվրոպական մտքերով դիմակավորված մահմեդական բուն ֆանատիկոսների մի խումբ, որն աստելով աստում է ամեն բան, ինչ եվրոպական է, աստում է լուսավորություն, քրիստոնեություն և այլն»¹²:

Ի պատիվ «Արմենիայի», պետք է ասել, որ թերթը, հավատարիմ մնալով «Մշակի» գաղափարներին և ռամկավար-ազատական գաղափարախոսությանը, ներկայացրել է գլխավորապես արևմտահայության կյանքը, սուլթանի բռնապետության տակ հեծող հայության ձգտումները, նրա տնտեսական և իրավական կացությունը: Արևմտահայ իրականության լուսաբանումը թերթի հրապարակախոսության մեջ ունի ճանաչողական մեծ արժեք: Թերթը մեծ տեղ է հատկացրել երիտթուրքերի քաղաքականությանը, արևմտահայերի ընդվզումներին, ցեղասպանության, կամավորական ջոկատների գործունեության հանգամանակի լուսաբանմանը:

Ազգի գոյատևման մտահոգություններով լի՝ «Արմենիան» անդրադարձել է հայության համար կործանարար գաղթականության խնդրին: Թերթը ձեռք է բերել համազգային հրատարակության համբավ՝ լուսաբանելով հայ ժողովրդի պատմության, մշակույթի և գրականության համար ընդհանրական նշանակություն ունեցող հիմնահարցեր: Այն հայերի ցավերի արտահայտիչն էր 1894-ի Սասունի ապստամբության, 1895-1896 թթ. հայկական ջարդերի, 1904-ի Սասունի նոր ապստամբության, 1909-ի Ադանայի դեպքերի և, վերջապես, Մեծ եղեռնի ժամանակ:

ЕЖЕНЕДЕЛЬНИК „АРМЕНИЯ“

(к 125-летию издания)

АЛОЯН Л. А.

Резюме

Газета „Армения“ была глашатаем свободомыслия. Во второй половине 1880-х годов в Западной Армении сформировались группы и союзы, активно содействовавшие самооборонительным боям армянского народа.

Идеологическая платформа газеты восходила к идеологемам партии Рамкавар и к идеологической концепции газеты „Мшак“. На страницах газеты издавались материалы, посвященные освободительной борьбе западных армян, геноциду армян в Османской Турции. Газета также выступала с резкой критикой политической линии младотурок.

¹² Մշակ, 1892, N 86: